



# FAKKEL-FLITSE

Weeklikse nuusflitse vir 'n ingeligte Framesby-familie!

Kontakbesonderhede: [nuusbrief@framesby.co.za](mailto:nuusbrief@framesby.co.za)

Uitgawe 147: 2 Maart 2018

## TYD VIR POSITIEF RAAK

Die winde van verandering wat die laaste paar weke soos 'n vars bries oor Suid-Afrika gewaai het, het 'n ongekende vlag van positiwiteit onder die meeste landsburgers laat posvat. Amper soos die Springbokke die Wêreldbeker in 1995 gewen het en die hele land, met president Mandela aan die spits, die euforie omhels het, en ons as 'n nasie gebloom het in 'n gees van trots en verdraagsaamheid. Dat hierdie fenomeen oor die daaropvolgende jare sou verwater tot 'n gees van ontnugtering en negatiwiteit, en dat ons leiers ons gruwelik in die steek sou laat, kon niemand seker in 1995 voorsien nie.

Die spreekwoord sê dat die wiel draai, en hier waar ons nou in 2018 staan, moet ons glo dat 'n nuwe era nou aangebreek het. Dat daar geen waarborge is dat ons weer in die steek gelaat gaan word nie, is 'n gegewe, maar om dit as 'n noodwendigheid te aanvaar en eintlik net te wag dat dit sal gebeur, sal niemand iets baat nie.

Kom ons maak 2018 ook in ons skool die begin van 'n nuwe en opwindende era. Kom ons gryp elke geleentheid om ons skool te ondersteun, om positief by te dra tot die uitbou van die waardes wat vir ons as gemeenskap ononderhandelbaar is. Dit gaan goed met Hoërskool Framesby, en ons is baie opgewonde oor die hope potensiaal wat hier opgesluit lê. Daar is egter soveel meer wat gedoen kan word om te verseker dat hierdie skool vir die jare wat kom, te vestig en verder uit te bou as 'n eiland van uitnemendheid.

Miskien het ons oor die afgelope dekade toenemend so moedeloos geword met ons politieke situasie, en die magteloosheid jeens die oënskynlik skurkagtige selfverryking wat hoogty gevier het op die politieke terrein, dat selfs ons skole onder verdenking begin kom het, en selfs moes deurloop onder venynige, en dikwels ongegronde, kritiek.

Mag hierdie nuwe gees van positiwiteit oorspoel na alle terreine van die lewe. Ons lewenstaak is om die beste te doen waar ons is, en dan sekerlik met 'n borrelende entoesiasme.



## Ons eie Passiespel 'n Framesby-eerste



Op 22 Maart gaan die Framesby-orkes en -kamerkoor 'n groot uitdaging aanpak wanneer hulle saam 'n passiespel gaan aanbied. Met hierdie spel word die verhaal van Jesus se kruisiging, soos vertel deur die apostel Johannes, met musiek deur die orkes verwoord. Dit belooft om 'n roerende geleentheid te wees en ons wil u aanmoedig om die aand opsy te sit om die uitvoering by te woon. Die aand begin om 19:00 en 'n vrywillige donasie sal as toegang aanvaar word. Sien u almal daar!

## 16 Maart: Rugby-aand met die Kings!

### VERJAARDAE HIERDIE WEEK

#### Saterdag

Demi Ainslie, 10B  
Douw Joubert, 8G

#### Sondag

Ruben Barnard, 9E  
Antonie Botes, 9G  
Tiaan Bouwer, 9A  
Annastacia Helmey, 11D  
Estian Jonck, 9D  
Shawn Momborg, 11D  
Elouise Moolman, 11E  
Vic Taylor, 8E

#### Maandag

Anke du Toit, 8G  
Kian Koekemoer,  
Odette Kruger, 11A  
Nolene Spinks, 11B

#### Dinsdag

Elmien Hartsliet, 8A  
Mekayla Koekemoer, 8G  
Elri Schooling, 8E  
Kylie van Greunen, 9G  
Dallyn Windvogel, 9A

#### Woensdag

Ian de Reuck, 10A  
Chanél Zeelie, 9C

#### Donderdag

Edrich Botha, 11E  
Rochelle Janse van  
Rensburg, 8B  
Marnu Mostert, 10C  
Tiaan van Eeden, 10G

#### Vrydag

Ronzard Botha, 8E  
Marli Opperman, 12C  
Derik van der Merwe, 11B  
Divan van Wyk, 11E

# FRAMESBY IS TROTS OP ...

## HEELWAT ATLETE DEUR NA OOS-KAAP-KAMPIOENSKAPPE



Tydens die Metro-byeenkoms wat verlede naweek plaasgevind het, het altesaam 32 van ons atlete die Metrospan gehaal wat volgende naweek aan die Oos-Kaap-kampioenskappe deelneem. Hulle is: Seuns O/14: Jean Baard (hoogspring en 1500m hindernis), Conrad Dames (driesprong), Brian Ellard (verspring en spiesgooi), Corne Scheepers (hamergooi), Zack Serfontein (3000m) en Gerhard Venter (1500m). Dogters O/14: Chaney Smit (hamergooi). Seuns O/15: Wehan Smith (800m en 1500m) en Michael Spinks (100m hekkies). Dogters O/15: Carla Gouws (driesprong), Monique van Rooyen (spiesgooi, verspring en diskus) en Keigh-Lee van Tonder (1500m en 3000m).

Seuns O/17: Jason Crous (hoogspring), Björn Ferreira (800m en 1500m), Jurgens Bornman (2000m hindernis), Tiaan Erskine (hamergooi), De-Leon Strydom (2000m hindernis) en Johan Van Biljon (diskus en gewigstoot). Dogters O/17: Lara De Bloe (1500m en 3000m), Gerrida Stadler (2000m hindernis), Melissa Hamilton (2000m hindernis), Anja Webber (1500m), Karla Scheffer (800m en 400m), Kelly Schmidt (3000m) en Juanita van Tonder (gewigstoot). Seuns O/19: Janno Agenbag (110m hekkies en 400m hekkies). Dogters O/19: Abigail Appelgryn (hoogspring), Nicole Cornelius (400m), Ilke Meiring (gewigstoot), Vicky Oelofse (1500m), Kara van Heerden (100m hekkies en verspring). Baie geluk aan al hierdie atlete, en baie sterkte met die byeenkoms volgende week!

## EERSTE PAINT RUN 'N REUSE-SUKSES

Verlede Vrydagmiddag en aand is die A-rugbyveld en die atletiekbaan behoorlik op horings geneem met die eerste Paint Run in Framesby se geskiedenis. Daar was meer as 300 deelnemers en almal het hulle gate uit geniet. Hierdie inisiatief deur die atletiek- en netbalafrigters het definitief gekom om te bly, en volgende jaar gaan ons beslis weer so maak!

Baie dankie aan almal wat so hard gewerk het om die geleentheid 'n sukses te maak. 'n Groot dankie aan almal wat pryse geskenk het, en in besonder aan die borg van die geleentheid, Haval PE. Sonder hierdie vriende van die skool sal baie geleenthede net nie moontlik wees nie.



## PROGRAM VIR HIERDIE WEEK

Saterdag 3 Maart	Sondag 4 Maart	Maandag 5 Maart	Dinsdag 6 Maart	Woensdag 7 Maart	Donderdag 8 Maart	Vrydag 9 Maart
Atletiek: OP Kampioenskappe Krieket VP 3des Cape Recife 6's Krieket (D) Oos-Londen-toernooi Golf School Challenge	Gholf: Schools' Challenge Krieket (D) Oos-Londen-toernooi	Dag 1 <b>TOETSDAG</b>	Dag 2 Krieket (D) 2de Pearson De Beers English Olympiad Debatklub	Dag 3	Dag 4 <b>TOETSDAG</b> Laerskole-sportdag Atletiek Oos-Kaap kampioenskappe	Dag 5 <b>TOETSDAG</b> Atletiek Oos-Kaap kampioenskappe Tennis: Sun City Krieket (D) 1 Westering



# NOG GROOT PRESTASIES!

Ons eerste dogterskrieketspan het gistermiddag behoorlik geskiedenis gemaak toe hulle Pearson vir die eerste keer in drie jaar geklop het!

Dit was 'n wedstryd waar die spanning maar hoog geloop het, en uiteindelik het ons dames met 'n pragtige spanpoging koning gekraai, welliswaar met 'n enkele lopies!

Baie geluk, dames! Ons het die heel seisoen kennis geneem van julle uitstekende vertonings en is nie net saam met julle bly oor hierdie pragtige oorwinning nie, maar werklik BAIE trots op julle almal. Julle hou die naam van ons skool ongelooflik hoog. Baie sterkte met die res van die seisoen!



## ENGELS DIE BESTE IN DIE OOS-KAAP



Dis met groot dankbaarheid, maar ook met baie groot trots, dat ons kan aankondig dat Framesby tydens die 2017-Nasionale Senior Sertifikaat-eksamen die beste in die Oos-Kaap gevaar het in English First Additional Language.

Ons leerders het almal die eksamen geslaag en ons het daarmee saam die grootste persentasie leerders gehad wat meer as 60% in die vak behaal het.

Ons het reeds in die algemeen oor ons goeie Gr. 12-uitslae berig, en is

baie trots daarop, maar hierdie toekening was werklik die "cherry op die koek"! Mag dit as aansporing dien om hierdie jaar nie net die prestasie te herhaal nie, maar om in meer vakke so te presteer. Baie geluk en baie dankie vir die harde werk aan ons Engels-personeel. Op die foto verskyn 'n baie trotse mevv. Basson, Janse van Rensburg en Landman, mej. Daniell en mev. Heystek. Die vakhoof, mnr. Joubert, was ongelukkig met die neem van die foto by 'n departementele kursus.

By die toekenningsgeleentheid in Oos-Londen is al die top-presteerders, asook die bes-presterende skole vereer, en kan ons met reg rapporteer dat Framesby een van net 'n handjievol skole is wat werklik uittroon op akademiese gebied. Die etos van harde werk en toewyding wat by al die top-skole gehandhaaf word, is net weer by die geleentheid beklemtoon. Mag ons vir jare nog onverbiddelik bly streef na uitnemendheid!

## TOETSE HIERDIE WEEK

Die volgende toetse word in die komende week geskryf:

**Maandag 5 Maart:**

Graad 9: EBW, Graad 10-12: Besigheidstudies

**Donderdag 8 Maart:**

Graad 8 & 9: Tegnologie, Graad 10: CAT Prakties, Graad 11&12: IGO

**Vrydag 9 Maart:**

Graad 8&9: Wisk SGA-opdrag, Graad 10-12: Wisk/WG Toets

# ALGEMEEN EN KOS VIR DIE SIËL

## DIE RAAISEL VAN DIE KWAAD

Dit is moontlik dat ons al so gewoon is aan kwaad en sonde as deel van ons lewenswerklikheid, dat ons nie meer besef hoe vreemd dit eintlik is dat daar in Gods goeie skepping so iets as kwaad en sonde kan wees nie. Ons noem dit selfs iets natuurliks, terwyl dit tog wesenlik teen-natuurlik is.

Dit val 'n mens op dat die Bybel self meermale op die raaiselagtige karakter van die kwaad wys. Dink maar aan die beskrywing wat die apostel Jakobus van die tong van die mens gee (Jakobus 3:1–12). Hy wys op 'n aangrypende manier die kwaad aan wat in die verkeerde gebruik van die tong opgesluit lê. Wat hom egter die meeste opval, is die ongerymdheid daarvan dat 'n mens met dieselfde tong God kan loof en die medemens kan vervloek. So iets is eenvoudig onvoorstelbaar.

'n Fontein laat tog nie uit dieselfde oog vars en bitter water opborrel nie. 'n Vyeboom kan tog nie olywe voortbring of 'n wingerdstok vyenie. Op dieselfde wyse behoort dit onmoontlik te wees vir 'n mens wat God só ken dat hy behoefte daaraan het om God te loof, om met dieselfde tong die medemens wat na die beeld van God geskape is, te vervloek.

Dit is die teen-natuurlike van die kwaad. Wat in die orde van die natuur tot die onmoontlike behoort, behoort op raaiselagtige manier tot die werklikheid van die mens. Jesaja sê dat 'n os sy besitter ken en 'n esel die krip van sy eienaar, maar Israel, die volk van die Here, het geen kennis nie (Jesaja 1:3). In die mens woon goed en kwaad saam.

Die mens is innerlik verdeeld en verward. Hy is deur God goed geskape, en tog kies hy die sonde bo die gemeenskap met God. Hy is deur God vir die liefde geskape, en tog word hy byna voortdurend beheers deur haat. God het hom bestem vir die lewe, en tog gryp hy naarstiglik na dinge wat vir hom moet uitloop op die dood. Dit is die verbysterende werklikheid van die mens.

Dit is onmoontlik om 'n verklaring vir hierdie teenstrydigheid te bied. Elke verklaring wat gebied word, loop op die een of ander wyse daarop uit dat die mens homself probeer verontskuldig. Ons is meesters daarin om die skuld vir ons toestand op andere te probeer afskuif. Die ergste van alles sou wees dat 'n mens op die een of ander manier aan God die skuld vir ons toestand gee deur te sê dat Hy ons nou maar een maal so gemaak het. Dit het Adam al probeer, toe hy aan God gesê het: "Die vrou wat U gegee het om by my te wees, sy het my van die boom gegee, en ek het geëet!"

As die Bybel ons één ding oor die sonde leer, dan is dit dat dit nie van God afkomstig is nie en dat ons niemand anders as net onself daarvoor kan blameer nie. Op die raaisel van die kwaad kan 'n mens nie met intellektuele verklarings reageer nie, maar net met belydenis en berou. Slegs dan is daar verlossing.

## JANRE, WILANIE EN JURGENS BLINK OP DIE PUK!

Dis met GROOT trots dat ons kan berig dat die Noordwes-Universiteit duidelik baie op Framesby staatmaak om top-studente aan hulle te lewer. Verskeie oud-leerders het al diep spore daar getrap op akademiese en sportgebied, en verlede week is dit net weer bevestig.

Janré Viljoen en Wilanie van Zyl het onderskeidelik die mans- en dames-tenniskampioenskappe van die universiteit gewen en is tans die PUK-tenniskampioene! Om alles te kroon het Janré sy ouer broer, Jurgens, in die halfeindstryd geklop om na die finaal deur te dring!

Ons het darem geweet dat hierdie twee hulle beslis sal laat geld, maar is baie trots om te kan sê hulle is Framesby-mense. Baie geluk al die Viljoene en Van Zyls. Mag ons nog BAIE van julle hoor.

## RUGBY-AAND MET DIE KINGS: 16 MAART

Die ouers van die groep rugbyspelers wat later vanjaar na Japan reis, bied op Vrydag 16 Maart om 19:00 'n aand met die Kings aan in ons skoolsaal. Hierdie aand is 'n fondsinsamelingsgeleentheid vir die Japan-groep.

Die koste beloop R80 per persoon, en ons wil u aanmoedig om die aand te ondersteun. Van die lede van die Kings se bestuurs- en afrigtingspan, sowel as 'n klompie spelers sal teenwoordig wees, en die aand beloop baie interessant en gesellig te wees.

Die prys sluit 'n hamburger en chips-ete in en die Ondersteunersvereniging sal 'n kontantkroeg bedryf.

Of jy nou 'n Kings-ondersteuner is of nie, kom geniet die aand en help so ons ouers om die koste van die toer te help dek. Sonder u ondersteuning sal die finansiële las op elke ouer baie groot wees. Omdat Japan regtig aan die ander kant van die aardbol is, is die vliegtuigkaartjies baie duur. Daarby is daar nog die koste van visums, versekering en klere.

Moedig asseblief u vriende aan om die aand by te woon. Bespreek somer 'n tafel van 10. Die kaartjies is beskikbaar by Westway-kafee, maar u kan navraag doen by die Algemene Kantoor. Kaartjies kan dan aangevra word. Sien u almal daar!